

Rapport dalla seduta dil cussegl da vischnaunca dils 23 da matg 2023 ad Andiast.

La presidenta dil cussegl, Mengia Risch fa a tuts presents in cordial beinvegni alla seduta da questa sera.

La gliesta da tractandas, la quala ei vegnida tarmessa tier cun l'invitaziun, vegn suttamessa alla discussiun. Cunquei ch'ei vegn buca fatg diever da tala ei la gliesta per la seduta da questa sera ligionta.

1. Approbaziun dil protocol dalla seduta dil cussegl dils 15 da november 2022

Il protocol ei vegnius tarmess allas cusseglieras ed a tuts cussegliers. La presidenta dil cussegl sutametta quel alla discussiun. Da tala vegn buca fatg diever. Il protocol vegn approbaus unanim (13:0).

2. Presentaziun quen e rapport annual 2022

Il quen annual 2022 dalla vischnaunca da Breil siara suenter expensas ell'altezia da frs. 14'104'354.51 ed entradas da frs. 15'529'431.10 cun in surpli entradas da frs. 1'425'076.59. Amortisaziuns ordinarias ein vegnidas fatgas ell'altezia da total frs. 885'763.00. Il quen d'investiziun siara suenter expensas da frs. 5'387'107.00 ed entradas da frs. 1'881'337.70 cun investiziuns nettas ell'altezia da frs. 3'505'769.30. Il quen ei vegnius revedius da Confidar Treuhand SA Glion, sco era dalla cumissiun da quen e gestiun dalla vischnaunca. Vinavon ha la cumissiun da quen e gestiun revediu il quen annual dalla Meglieraziun Breil-vitg. La munconza dad aua ei semussuas uonn cun entradas pli bassas tier il tscheins d'aua sco era tier nossas duas ovas a Casut e Ruinas. Cun sbassar las taglias sin 90% ha ei era dau meins entradas da taglia. Vinavon ha ei dau pli paucas entradas tier il provediment d'aua sco era tier la dismessa quei era pervia dalla reduenziun dallas taxas.

Clau Schlosser presenta il quen annual cun tut ils detagls e dat sclariment sur dallas differentas posiziuns e las differenzas visavi il quen 2021 sco era il preventiv 2022. Sin las damondas duront la presentaziun sa vegnir rispundiu per cuntentientscha dils presents.

La discussiun vegn dada libra. Cunquei che las damondas aviartas han saviu vegnir rispundi duront la presentaziun dat ei neginas ulteriuras damondas. Ei vegn era buca fatg propostas per midadas ni adattaziun dil quen annual.

3. Rapport da revisiun ed approbaziun dil quen annual 2022

Andreas Cadonau, president dalla cumissiun da quen e gestiun, rapporta sur dalla revisiun prida avon e menziunescha il fatg ch'il quen ei sco emprem vegnius revidius dil biro fiduziari Confidar SA. La cumissiun ei fetg satisfatga dalla buna lavur dalla suprasatonza communal e dall'administraziun. Il quen seigi vegnius presentaus al cussegl en tut ils detagls, aschia che la cumissiun stoppi buca commentar tal. Ins hagi controllau tut las spartas dil menaschi da vischnaunca e saviu constatar che la contabilitad ei menada conform ils principis mercantils. En cass da damondas hagi la cumissiun survegniu in detagliau e clar sclariment.

La cumissiun propona d'approbar il quen annual 2022 e dar scarica alla suprastonza sco era a tuts emploiai. Andreas Cadonau engrazia alla suprastonza, all'administraziun, als emploiai ed a tuts funcziunaris per la buna lavur prestada el decuors digl onn vargau ed en favur dalla vischnaunca.

Las cusseglieras ed ils cussegliers fan negin diever dalla discussiun. Per consequenza vegn il quen annual 2022 sco era il quen dalla Meglieraziun Breil-vitg suttamess alla votaziun. Cun tscherna unanima (13:0) approbescha il cussegl ils quens annuals cun dar scarica a tuts funcziunaris.

Il quen vegn repartius en tut las casadas e mess sin nosssa pagina d'internet. Convischinas e convischins che ein buca cuntents cun l'approbaziun dil quen ni cul quen sco tal, san far diever dil referendum facultativ tenor constituziun communal.

4. Dissoluziun dalla Corporaziun schigentera solara da gliet Cadi

Dapi la primavera 2003 ei la schigentera solara da gliet Cadi a Zignau en funcziun e schigenta il gliet dallas sereneras da Sedrun, Mustér, Curaglia, Zavràgia (Sumvitg/Trun) e Sorts (Breil). Problems technics da tuttas uisas han ils emprems onns fatg fastedis al caumenaschi dalla schigentera ed era alla Corporaziun. Il bien inschign dil caumenaschi e la beinvulientscha dallas delegadas e dils delegai dalla Corporaziun han possibilitau ch'il gliet dallas sereneras dalla Cadi ha adina saviu vegnir schigentaus a moda ecologica per lu vegnir barschus u ella fabrica da cement Holcim a Vaz Sut ni ella barschera da rumians GEVAG a Trimmis.

Ils davos onns cun adina dapli e pli ferma aurasut a Zignau/Lumneins ein era las immissiuns da friads pils vischins s'augmentadas considerablamein. Las reclamaziuns dils direct pertuccai vegnan adina pli savens ed ein el cuntegn era adina pli pretensiusas.

Las immissiuns da friads dalla schigentera ein actualmein per temps, en special cu il gliet vegn mess ella halla solara e rasaus ora leu ed era en temps cun aultas temperaturas e cheutras era gronda svapuraziun dall'aua ord il gliet, fetg intensiv e cheutras era fetg mulestusas per ils vischins.

Tuttas stentas, emprovas ed investiziuns d'entochen ussa han buca purtau ina migliur marcanta dallas immissiuns da friads che savess esser supportabla per ils vischins mulestai. Ina eliminaziun dils friads ei fetg custeivla e caschuna cuosts per la dismessa dil gliet entras la corporaziun che ein la finala massiv pli aults che tier la dismessa dil gliet ella TRAC a Cuera.

La radunonza da delegai dalla Corporaziun schigentera da gliet Cadi ha decidiu en la radunonza dils 16 da fevrer 2023 per mauns dallas vischnauncas cumpigliadas, da calar cun schigentar il gliet dallas sereneras Cadi a Zignau e da furnir il gliet alla TRAC a Cuera.

La suprastonza fa la proposta al cussegl da dissolar la Corporaziun schigentera da gliet Cadi per mauns dalla radunonza communal igl atun 2023.

Clau Schlosser presenta la fatschenta e dat aunc ils sclariments necessaris. Sin las damondas sa vegnir dau risposta per cuntentientscha dils presents.

La discussiun vegn dada libra. Cunquei ch'ei vegn buca fatg diever dalla discussiun vegn votau giu. Il cussegl decida unanim (13:0) per mauns dalla radunonza communal la dissoluziun dalla Corporaziun schigentera da gliet Cadi.

5. Elecziun: cumissiun scola

Sarah Huber da Dardin ei sedecidida da seretrer dalla cumissiun scola sin la fin digl onn da scola 2022/23. Cunquei che Maria Luisa Middea cala sco suprastonta sin ils 30 da zercladur 2023 eis ella sedecidia da far part alla cumissiun scola.

Aschia fa la suprastanza communal la proposta d'eleger la Maria Luisa Middea d'Andiast sco nova commembra dalla cumissiun scola naven digl 1 d'uost 2023.

Ei vegn fatg neginas ulteriuras propostas. Cun tscharna unanima (13:0) elegia il cussegl Maria Luisa Middea sco nova commembra dalla cumissiun scola.

6. V a r i a

Clau Schlosser engrazia a Maria Luisa Middea per la buna lavur ed igl engaschi prestau en suprastanza. Ella ei sedecidida da calar en suprastanza cun ils 30 da zercladur 2023.

Luzi Pfister engrazia el num dil cussegl da vischnaunca a tut ils luvriers forestals, stradals e tourismus per la buna lavur prestada per la vischnaunca seigi quei la stad ni era igl unviern.

Mengia Risch engrazia per la preschientscha e la partizipaziun. Ella giavischa allas cusseglieras ed als cusseglers in bien retuorn a casa e siara la seduta allas 21:40 uras.

Breil, ils 24 da matg 2023

La presidenta

Mengia Risch

Igl actuar

Curdin Cadonau